



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Liber dissencionum archiepiscopi Coloniensis et Capituli Paderbornensis**

**Dietrich <von Engelsheim>**

**Münster, [1893-1897]**

79. Meliorationes concepte, si ecclesia Paderbornensis ad centum annos maneret circa ecclesiam Coloniensem, quomodo et qualiter fieri deberent.

[urn:nbn:de:hbz:466:1-54427](https://nbn-resolving.org/urn:nbn:de:hbz:466:1-54427)

[Vergl. Nr. 32.]

Also hir vor steit van solker nottelen, dat de er- 79.  
 werdige in Got vader unde her, her Diderich, ertzebiscope 1415.  
 to Colne unde syn stiffe van Colne mogen hondert jar Mitte Dez.  
 na sinem dode by dem stiffe van Colne beholden dat  
 stiffe van Paderborn, so is dit nabescreven vorwaringe  
 unde beteringe, de uns domproveste, deken unde capitele  
 to Paderborn vor uns, unse kerken, stichte, manscop  
 unde undersaten geystlik unde wertlik unse genedige  
 her ergenompt unde sin ca pitel to Colne up voryninge,  
 so vorgerort is, wedder doen sollen.

1. To deme ersten, dat unse genedige her van  
 Colne unde syn capitel to Colne tho dusser voreyninge  
 sollen erwerven willen unde vulbort unses geystliken  
 vaders, des pawes oder concilii generalis, des allerdor-  
 lufftigen forsten, unses genedigen heren, heren Seges-  
 mundes, Romeschen koninges, des erwerdigen in Got  
 vaders hern Conrades, ertzebiscopes to Mentze, unses  
 unde unses stichtes van Paderborn metropolitans, unde  
 sins capitels to Mentze unde vort anderer, de des to  
 donde hebben, dar wy wol an vorwaret werden al de  
 hondert jar umme, under erer kost unde sunder unsen  
 schaden.

2. To dem anderen, dat wy, unse kerke unde stichte,  
 ritterscop, stede unde undersaten, geystlik unde wertlik,  
 so de darto horet, sollen bliven by allen vriheden, privi-  
 leien, herlicheiden, rechten unde wonden<sup>1)</sup> sunder jenier-  
 leie argelist.

3. To deme derden so scollen alle privileie unde  
 breve, de unse here vorgerort, sine vorvaren des stichtes  
 van Paderborn gegeven unde myt unsem willen unde  
 vulbort besegelt, unde de wy bysundern des stichtes

<sup>1)</sup> Gewohnheiten.

mannen besegelt hebben, unvorbroken in vuller maght bliven unde geholden werden, utgeseght breve, de up de vormundescop up de teyn jar sprekende gegeven sint.

To dem verden. Wan unse genediger here van dodes wegen affginge, unde dat capitel to Colne eyne andern heren kesen wolden, den dagh unde stede des kors solden se uns to Paderborn unvortoget verteynnacht to vorne kuntlik doen in eren breven. So solde wy unde mochten dan vere van unsem capitele, de uns dar bequemest to duchten, vogen to deme kore, denselven kor mede thodonde, to sterkende ef to krenkende; unde dit so doen, so vaken dat geschege, aldewile dusse voreyninge waret. Unde wenn so we koren were, den en solle wy nicht tolaten, he en hebbe ersten gedan eyde unde loffte up privileie unde breve, also dat unser kerken wontheit is, unde andere vor em gedan hebben. Unde de en sal neyne huldinge eff eyde eischen ef nemen, et en sy unse wille, unde en sche van unsem heiten, so sus lange geschen is.

5. Item, wan unse her van dodes wegen vorvallen is, so scollen de amptlude des stichtes van Paderborn tor stund dem capitele eder eren vrunden de slotte antworten sunder weddersprake. De sollen de dan holden so lange, dat eyn biscop van Colne dem stichte unde capitele to Paderborn gedan hebbe, also wontlik is, unde dat de amptlude entleget<sup>1)</sup> werden, unde dusses so doen, so vaken also des noet wert.

6. Item se sal unse her unde sine nakomen eyne wigelbiscop unde eyne official, de sy vicarius in spiritualibus generalis, setten na unsem rade unde vulbord, de in unsem stichte besetten syn, unde de official sal to Paderborn wonnen unde sin ampt oven.

<sup>1)</sup> entfernen; es kann auch gelesen werden: entvoget d. h. die Befugnisse verlieren.

7. Item so en sal unse here, syn official, ere nakomen neyne exactionem decime eder karithativum subsidium van papheit des stichtes van Paderborn sunder unssen raed eyschen, so sus lange is wontlik gewesen.

8. Item so en sal unse here dem hogebornen iunchern Wilhelme van dem Berge neyne slot in deme stichte van Paderborn bevellen, noch ene marscalk maken effte jenige ampte bevellen sunder unsen willen.

9. Item so en sal unse here to dem Nienhuss eff to dem Dringenberge ef anders in dem stichte van Paderborn [neyne]<sup>1)</sup> amptlude setten, et en sy myt unsem guden willen. Unde de amptlude sollen besegelde breve geven, uns, des stichtes undersaten, geystlik unde wertlik by eren privileien, rechten, wonden unde aldem herkomen to laten unde beholden, so unse here ouk rede gelovet unde vorbrevet hevet.

10. Item so scollen de marscalk unde amptlude unsses, hern in dem stichte van Colne uns unde des stichtes van Paderborn man unde undersaten truweliken bistendich unde behulpen wesen gelijk undersaten des stichtes van Colne, unse beste to donde unde to werkende na al erer maght, unde neyne name<sup>2)</sup> nemen of nemen laten sunder argelist, unde an unsen horigen luden unbedranget laten.

11. Item were, dat jenige lengode, amptgude, dem stichte horende, loss worden, der en solde unse here nicht vorleinen noch vorgeven bynnen edder en buten dem stichte van Paderborn, dat en schege myt unsem willen.

12. Item weren jenige heren, de gude van der kerken van Paderborn to leyne hebben solden unde der nicht entfangen hedden, noch entfan wolden, dar solde

<sup>1)</sup> ergänzt. <sup>2)</sup> Beraubung, Wegnahme (besonders an Vieh.)

unse here unde sine nakomen to helpen, dat de dat entfengen unde rechtig<sup>1)</sup> worden.

13. Item so sal unse here bynnen ses jaren losen das Niehus, den Dringenbergh, Beverungen unde Steynheim, sodat de dan, wan de ses jar vorlopen sint, loss syn, unde de buwen, unde beteren unde truwelikon verwaren laten.

14. Item so sal unse here myt sinen amptluden to dem Kogelenberge bestellen, dat de stifte van Paderborn an erem gelde, se daran hebben, unvorlustiget bliven, unde dat doen, so vaken des noet wert.

15. Item, alse de Kolscen<sup>2)</sup> unde de van Volkmersen Meiderike broken haven, so sal unse here bestellen, dat to behoff des stichtes van Paderborn Mederike wedderbuwet werde, unde se vernoget<sup>3)</sup> werden, de den schaden leden.

16. Item so sal unse here de amptlude unde des stichtes vrund, de geamptet unde nederlegen<sup>4)</sup> hebben in der tyd, alse biscop Wilhelm unde wy uneyns weren, entleyen<sup>5)</sup> na unsem rade.

17. Item umme grotes openbaren vorderffliken schadens willen unde vorwosteninge unser provende so sal unse here unse provenden beteren myt hundred molder korns unde hundred gulden geldes jerliker gulde unde uns der vorwaren unde al jar ver voder wyns geven, twe to sinte Mertin unde twe to Mitfasten unde de tho Paderborn mit siner kost to behoff des capitels senden.

18. Item umme grote scult, dar wy in komen sint van biscop Wilhelme unde wedernot,<sup>6)</sup> so unse kerken de doner vordervede merkliken unde scedeliken, dat unse here na unsem rade late vallen van den twedusent unde achtehundert guldenen, he sculdich is, de toscreven

<sup>1)</sup> dem Stifte verpflichtet. <sup>2)</sup> die Kölnischen. <sup>3)</sup> befriedigt. <sup>4)</sup> Schaden leiden. <sup>5)</sup> entschädigen. <sup>6)</sup> Wetternoth.

sint en deyl des stichtes vrunden, to behoff des stichtes, dat der wat to buwe unser kerken gekart worden.

19. Item, alse wy rede twehundert guldene an dem ampte to Beken hebben, dat unse here dat ampt myt dem Nienwolde unde anderer tobehornige uns dat to nut unde behoff der kerken dat egene unde des vorwaringe doe.

Alle dusse vorgerorte puncte unde artikele semetliken unde bysundern sal unse here vor sek, sine nakomen, capitel unde stichte van Colne uns unde dem stiffe van Paderborn loven, stede, vast unde unvorbroken to holden, unde to merer sekerheit so sollen dat capitel to Colne vere erer heren, unde de borgermestere unde reide Brilen, Ruden, Geseke einen borgermester ut ener itliken der stede unde dre ute den reiden to borgen setten. Unde wy domdeken unde capitel to Colne, borgermestere unde reide der ergenompten stede enkennen, dat wy deme so doen sollen unde willen. Unde weret, dat dusse ergenompten artikele vorbroken worden, so sal unse here ergenompt eder sine nakomen bynnen dem neisten mande, se darumme manet worden in erer gegenwordicheit eder hus, der gebrek ervullen unde keren sunder wedderrede. Wer aver, dat se des nicht erfulden ef kerten, unde dar clage van keme, so sal unse here ergenompt ef sine nakomen bynnen dem mande nest inriden to Paderborn by domdeken unde prior darselves unde dar bekennen unde sen laten de legenheit des gebrekes. Wat de des erkennen, dar sal dat by bliven unde deme sal men so volgen. Wer, dat unse her, sin capitel unde ere nakomen des nicht en deden, so solde unsse here ef sine nakomen myt den borgen unvertoget mit sins selves live unde twintigh mannen unde perden, eyn juwelik domhere to Colne myt ver perden unde mannen, eyn iuwelik ute den reiden mit twe perden unde einem knechte na der maninge ergerort in de stat to Paderborn

in lestinge riden unde ute der stat nicht komen, de gebrek en si ersten erffullet unde gekart. Unde unse here ergenompt sal vort bekennen vor sek, sine nakomen unde stichte, unde domdeken unde capitel vor se unde ere nakomen in eren openen besegelden breven, dit so gededinget syn; unde sollen loven unde sweren, dit so to holden; desgeliken ouk de ergenompten stede doen sollen. En werden dan darenboven dusse ergenompten artikele nicht gehalten, — dar Got vor wesen mote, — so sollen domprovest, deken, capitel, manscop, stede unde undersaten, geystlik unde wertlik, alles horsames, eyde, truwe, hulde unde underdenicheit, wo de namen egen, samet unde bysundern, geystlik unde wertlik, quid ledich unde loss syn, wesen unde bliven, daran se myt dem stichte van Colne setten hedden unde gedan weren; unde vort van dem stichte van Colne gensliken, gruntliken unde ewigen scheden sin unde bliven. Unde unse here sine nakomen unde capitel en solden dan vorder to dem stichte van Paderborn neyne ansprake van der voreyninge wegen hebben noch upthen neinerleye wise sunder jeingerleie argelist unde geferde. Datum anno Domini MCCCCXV circa festum beate Lucie virginis.

79. Alse dusser ergenompten artikele vorraminge geschen wass, van den hirvor bescreven is, do wort vordregen myt unsem heren, dat men solde twene van deme capitele, twene van der manscop unde twene van den steden senden an den pawess, an den keyser unde an den biscop unde capitel to Mentze, de dar solden seyen unde clagen, dat de stifte van Paderborn were vorbrant, vorwostet, berowet, vordervet unde also deger vornichtiget, dat sek dar neyn biscop vortmer van holden unde ernerren mochte, unde hedden darumme sek to hundert jaren an

den stiffe to Colne van noet gedaen unde dusse erge-  
 nompten artikele to beteringe vorramet, unde solden  
 darup bidden, se dat willigeden, bestedigeden unde eren  
 vulbort geven wolden, dat dussen so worde volget unde  
 nagegaen. Hirto worden, dit to wervende vor unsen  
 heren, benomet unde belevet: Her Wedekind Spegel  
 domprovest, her Lodewich van Rostorpe, ute dem capitele,  
 Albert van Haxthusen unde Heydenrich van Heyen ute  
 der manscop, unde Conrad van dem Haddenberge unde  
 Henrich Clenberg van der stede wegen, de unse here  
 let bidden, dat se up sine kost deme so doen wolden.  
 Up welke bede se to Paderborn by dat capitel reden  
 unde des eren willen darup ervaren wolden. So vunden  
 se, dat et nicht wass myt heyten eff vogende des ca-  
 pitels dedinget unde en towedern wass. So slogen se  
 dat aff unde menden dat so, solke logenmere an ere  
 oversten unde heren bringen en wolden se nicht doen.  
 Et en ervunde sek ok nicht in warheyt, dat de stiffe  
 van Paderborn so vordervet were, dan se menden, na  
 deme andere lant, umme se belegen ere heren nerden,  
 so solde wol vor twe biscope de stichte van Paderborn  
 genochlich syn; menden vorder, by anderer heren tyden  
 swarer en wedderstan<sup>1)</sup> syn, dat se doch nicht wolden  
 anders sek bringen laten, wan ere vorfaren wesen hedden.  
 So wort alle dink affgeslagen van den saken, sodat unse  
 here van den saken nu<sup>2)</sup> reden let, went dat he dussen  
 unwillen (dusses bokes) uphoff.

Bulla Eugenii, pape, missa imperatori.

Carissimo in Christo filio Sigismundo, Romanorum  
 imperatori illustrissimo.

<sup>1)</sup> ergehen. <sup>2)</sup> nie.